

Qamutit motorillit akileraarutaat pillugit Inatsisartut inatsisissaat nr. 3, 16. juni 1987-imeersoq

§ 1. Qamutit motorillit, Kalaallit Nunaanni aqqusinikkut angallannermut inatsit naapertorlugu nalunaarsorneqartussaasut landskarsimut nakkartussamik akileraartassapput.

Imm. 2. Tamatumani pineqanngillat qamutit motorillit kommunet qatserutaat annaassiniutaallu, napparsimmaveqarfiup napparsimasunik angallassissutai kiisalu qamutit motorillit nunat allamiut aallartitaqarfiinit imaluunniit konsuleqarfiinit imaluunniit aallartitaqarfinni sulisunit qallunaatut innuuttaassuseqanngitsunit pigineqartut.

Imm. 3. Naalakkersuisut taakkualuunniit tamatumunnga piginnaatitaasa qamutit motorillit innarluutilinnik angalassissut, qamutit toqusut illerfiinik assartuutit aammalu qamutit motorillit bus-itut atorineqartartut akileraarummik akiliinnginnissaannut akuersisinnaapput.

§ 2. Akileraarutit ukiumut angissuseqarput:

A. Qamutit motorillit 900 kg. tikillugit oqimaassusillit: kr. 4.440.

B. Qamutit motorillit 901 kg.-miit 1.500 kg. tikillugit oqimaassusillit: kr. 6.240.

C. Qamutit motorillit 1.500 kg. sinnerlugit oqimaassusillit: kr. 8.160.

D. Motorcyklit: kr. 2.400.

Imm. 2. Akileraarutit, ukioq affakkaarlugu siumut akilerneqartartussat 1. april aamma 1. oktober akiligassanngortassapput, piffissaagallartillugu akiliiffissaq tassaalluni qaammammi akiliiffissami ullut 20-issaat. Piffissaagallartillugu akiliiffissaq nalliuttuuppat arfininngornerullunuunniit akiliiffissaq ulluinnarmut tullermut kinguartinneqassaaq.

Imm. 3. Akileraarutit piffissaagallartillugu akilerneqarsimangippata akileraarutit 500 kr.-nik ilassuserneqassapput.

§ 3. Qamutit motorillit nalunaarsorsimaffiannut nalunaarutiginninnermi, § 4, imm. 2-mi taaneqartut pinnagit, akileraarutit qaammatip nalunaarsorneqarflup 1.- aniit naatsorsorneqassapput. Biilit normuat tunniunneqartinnagu akileraarutit akilerneqareersimassapput.

Imm. 2. Qamutit motorillit siusinnerusukkut nalunaarsorneqareersimasut nalunaarsortinneqarqinneranni biilit normuat aatsaat tunniunneqassaaq akileraarutit akiligassanngorsimasut, § 4, imm. 1 naapertorlugu utertinneqarsinnaanngitsut, akilerneqareerpata.

§ 4. Qamutit motorillit nalunaarsorsimaffimmut atorunnaartutut nalunaarutigineqarpata, akileraarutit akilerneqarsimasut qaammatip atuiunnaarfiup tulliani 1.-aniit utertinniarneqarsinnaapput. Akileraarutit sippuutaasa utertinneqarnissaannut piumasaqaat atuiunnaarnermik nalunaarutiginninnermiit qaammat 1 qaangiutsinnagu nassiunneqassaaq.

Imm. 2. Qamutit motorillit nalunaarsorneqarfimmut nalunaarutigeqqinneqarpata, politeeqarfimmi tassani allamiluunniit nalunaarutiginninneq pigaluarpalluunniit, akileraarutit akilerneqarsimasut utertinniarneqarsinnaanngillat nalunaarutiginneqinneq atuiunnaarluni nalunaarnermiit qaammatip ataatsip iluani pisiappat.

§ 5. Akileraarutit akiligassanngortinneqassapput akileraarutit akiligassanngortinneqarfianni qamutit motorillit nalunaarsorneqarfianni piginnittutut nalunaarsorneqarsimasumut.

Imm. 2. Qamutit motorillit aqqusinermi angallannermut inatsimmi aalajangersakkat unioqqutillugit nalunaarsuiffimmut nalunaarutigineqarsimangippata, qamutit motorillit nalunaarutigineqarnissaannut pisussaasoq aki leraarutinut akiliisinneqassaaq piffissami qamutit motorillit nalunaarsuiffimmut nalunaarutigineqaratik atorneqarfianni.

§ 6. Akileraarutit akiliisitsineq Akileraartarnermi Pisorta qarfimmit isumagineqassaaq.

Imm. 2. Qamutit motorillit nalunaarsorneqartut, taamaatitsinerit, nuunnerit aammalu piginnittup allanngornera il.il. pillugit politiit Akileraartarnermi Pisorta qarfimmut nalunaaruteqartassapput.

Imm. 3. Qamutit motorillit nalunaarsorneqarsimasut akileraarutaasa akilerneqarsimanginnerannik politiit Akileraartarnermi Pisorta qarfimmit nalunaarfigineqarunik biilit normuat piaarnerpaamik arsaarinnissut igissavaat.

§ 7. Kinaluunniit akileraarusiissamut, akileraarutit akilerneqarsimasut utertinneqarnissaannut imaluunniit akileraarutit annertussusissaannut naatsorsuinissamut piaaraluni mianersuaalliorujussuarluniluunniit paasissutissiingitsoortoq imaluunniit eqqunngitsunik paasissutissiisoq akiliisitsinermik pineqaatissinneqassaaq, inatsit naapertorlugu allamik pineqaatissinneqassanngikkuni.

Imm. 2. Aktieselskabi, anpartsselskabi, andelselskabi assigisaalluunniit unioqqutitsippata selskabi akiliisussanngortinneqarsinnaavoq. Kommune kommunelluunniit ingerlataa unioqqutitsippat, takuuk kommunalbestyrelsit, bygderådit il.il. pillugit Inatsisartut inatsisaanni § 57, kommune kommunelluunniit ingerlataa akiliisussanngortinneqarsinnaavoq.

§ 8. Inatsisartut inatsisaat 1. juli 1987-imiit atuutilissaaq.

Imm. 2. Piffissami 1. juli 1987-imiit 30. septemper 1987-imut akileraarutit 1. juli 1987-imi akiligassanngortinneqassapput.

Imm. 3. Inatsisartut inatsisaata atuutilerfianiit qamutit motorillit akileraarutaat pillugit Inatsisartut inatsisaat nr. 8 23. oktober 1979-imeersoq kingusinnerusukkut allannguutitalik, atorunnaarsinneqarpoq.

Imm. 4. Inatsisartut inatsisaata matuma piviusunngortinneqarnissaannut maleruagassiat pisariaqartut Naalakkersuisut aalajangersassavaat.

Namminersornerullutik Oqartussat, ulloq 16. juni 1987

Jonathan Motzfeldt

